

乃因高爲臺順時謀築披翳薈剪林麓鏹重岡移峻谷量其遠近以
議夫土功命彼般倕再度其山木使人以悅無告於勞均力取材不
遠而復屹九重以初起憑一簣而始覆其爲勢也峨峨皚皚粉壁光
兮朱門開若方丈與蓬萊其爲麗也崢嶸郁煜星柱浮兮雲楣肅狀
靈光與景福有時鳴猿告曉貞松斂靄千峰轉日迎秀色於瓊樓萬
歲傳聲和幽音於地籟磅礴壓乎人境抱劣聳乎天外王喬飛舄見
鳬影之翩翩神女窺窓聽鸞歌之噦噦俯衆山兮如束縈八川兮如
帶上方向晦宴息齋心防戒乘金根駟玉軼夸父秉鉞蚩尤揚旆鐵
衣沸渭以焜煌寶馬騰驤而沛艾環鈎陳而列武士震砰訇兮軼埃
塏登夫集靈之臺謂天帝而爲會奏無聲之樂寂寞而難分展無體
之禮質素而無文睟容綽約元化氤氲聖主湛恩散作八方之雨清
都喜氣凝爲五色之雲彼昇龍鑄鼎之后捧盤承露之君徒髣髴於